

編號 1 號

【路燈著咧】林伯殷原作

臨暗邊，天還已亮，屋脣个路燈就著咧，係無看較真兜，頭下碼¹還正經毋知路燈著咧，一直愛等到天轉暗，路燈个火正會緊來緊光，正確確實實知自家屋脣个路燈著咧！在暗晡時頭，這支路燈摻住屋脣个大路箭到²光光，摻出出入入个人、車仔照到清清楚楚，逐日食飽夜以後，鄰舍會企在路燈下打嘴鼓，共下等垃圾車來；熱天時，屋肚較熱，路燈下自然就變成奈涼、散步个場所，等到冷天時，路燈又變成一蕊光明燈，像人摻住講，看著佢，燒暖个屋下就到咧！

臨天光，路燈就起勢慢慢行下戲棚，天越光，路燈火就越看毋著，最尾，連幾時烏忒个也無人知，路燈非常知進退，完全毋會去摻日頭搶光³，在日時頭，路燈就在該恬恬等，等夜來个時節做得好好發揮一下。

等到斷烏咧，路燈準時來上棚！摻負責个所在照到光光亮亮，到久咧，人嘎分路燈縱壞，毋記得佢逐夜就恁認分、恁煞

猛，一直愛到有一夜，發現本旦該光个地方還暗暗，正會知路燈原來有恁好惜。想起佢个老屋，暗晡時屋脣滿遍暗摸叮咚⁴，係無擎火，根本就行無路，毋使想出半步門，毋過，就算有擎手電筒行路，該細電珠仔⁵發出弱弱个光係照得路來，會驚頭那頂有喇崎網無看著，係照得頭那頂來，又驚蛇哥隨時會對路脣弄出來⁶，毋管自家仰般細心細意，心肝肚還係會驚驚險險⁷，仰當得⁸這下个路燈火，分人恁安心、恁自在！

一支路燈，照光个地方盡有限，毋過，路燈係一支一支連起來，該就做得照亮一隻莊頭、一條街路、一座都市。路燈毋單淨照亮一隻地方，也減少忒日摻夜个爭差⁹，改變人个生活。都市肚个公園，暗晡頭還有人打氣功、跳舞摻運動，大路町也還有人行路摻騎自行車，係無路燈，敢有可能？

暗咧！路燈又著咧！佢知路燈會摻當多暗暗个地方照到光光，分人方便上下、分人做得安心，佢也知有當多人摻路燈共樣，恬恬在該照亮佢个社會。

¹ 頭下碼：音 teu ha⁺ ma⁻；剛開始的時候。

² 箭到：音 zien⁻ do⁻；被光照到。

³ 搶光：音 ciong⁻ gong⁻；爭著出風頭。

⁴ 暗摸叮咚：音 am⁻ mo⁻ din dung；天色或環境暗得看不見的樣子，形容一片漆黑。

⁵ 電珠仔：音 tien⁺ zhu⁻ er；燈泡。

⁶ 弄出來：音 nung⁻ chud loi；鑽出來。

⁷ 驚驚險險：音 giang⁻ giang⁻ hiam⁻ hiam⁻；感到驚險可怕的樣子。

⁸ 仰當得：音 ngiong⁻ dong⁻ ded；怎麼比得過。

⁹ 爭差：音：zang⁻ ca⁻；差別。

110 年全國語文競賽客家語朗讀文章國中學生組（海陸腔）

編號 2 號

【學泅水】徐姿華原作

佢一溜來斯當驚水，小學一年生該下，先生鼓勵大家學泅水，講泅水係當好個運動。佢身邊個好同學做下曉泅水咧，逞強個佢毋願輸人，轉去屋下緊嚟¹阿媽講愛去學泅水。趕避暑，阿媽摺佢尋著一間溫水個游泳池，還請著名聲盡好個教練來教佢，又買一身靚靚個連身泅水衫分佢著，鼓勵佢勇敢學泅水。

第一擺去到游泳池，又驚又好。做好體操，教練渡佢摺另外四個學生仔練習沒水、學換氣；教練摺佢兜一個一個拗落游泳池，佢兜乖乖聽教練指示，摺頭那沒落水竇肚，佢嚇到盡命牯巴等游泳池喇脣、腳踇踇毋敢沾著水、嘶骸另命、噉到凜流凜串²，像分人苦毒到當慄樣；脣頭個人做下緊看佢緊笑，教練緊拐佢，佢還係噉到失聲、毋肯落水竇肚去，高不將斯請阿媽摺佢渡轉去。

該暗晡，阿爸好聲好氣鼓勵佢續等去學泅水；阿媽斯唉唉唧唧道嘆：「若係毋去上課，學費無好退，錢斯會白白了忒去。」

阿哥也分享自家學泅水個經驗，還拿出佢當愛惜個極樂仔，講愛做佢學會泅水個獎品。在大家個鼓勵之下，佢答應第二日愛再過去上游泳課咧。

第二日朝晨，阿媽愛載佢去上游泳課，追了追佢還係生拉拉、死拉拉³、拖拖擲擲毋肯停動。上課時間強強會赴毋著咧，阿媽闕到拿起雞毛掃⁴愛修理佢，佢試著當委屈，又驚阿媽打，又驚愛下水泅水，斯噉到馬咬樣，歸條巷仔都聽到清清楚楚。鄰舍過來關心，知佢係驚泅水正噉到大嫲聲，做下忍等笑鼓勵佢。斯恁樣，該站時間，朝晨頭巷頭巷尾若係聽著佢又噉到哇哇滾，斯知該日佢又愛去上游泳課咧。

經過三隻禮拜個練習，游泳課個同學一批一批學會走忒咧，同學換了換，佢還係手摺腳配合毋著，手記得划水咧，腳又毋記得踢水，實在無結煞。有一日，佢自家練習，毋多知手摺腳嘎配合得著咧，泅有五公尺恁遠，心肝肚實在還歡喜那！佢續等練習，緊來緊熟手，手腳也緊來緊省力，臉身也緊來緊輕鬆，第一擺感受著泅水個趣味。

感謝該量時，屋下人支持也鼓勵驚水個佢面對自家個困難去學泅水，分佢有機會去克服自家軟弱個所在，這下個佢，毋單淨曉得泅水也做得堅強去迎接人生個各種挑戰。

¹ 嚟：音 kiau；言語糾纏。

² 凜流凜串：音 pi⁺ lau pi⁺ chon^ˇ；鼻涕在口鼻間上下流竄。

³ 生拉拉死拉拉：音 sang[`] lai[`] lai[`] si[`] lai[`] lai[`]；死活不肯就範。

⁴ 雞毛掃：音 gai[`] mo[`] so^ˇ；雞毛撻子。

編號 3 號

【拈田螺】郭亭好原作

當久毋識轉莊下，記得莊下个風特別涼、天特別青。熱天佢膠老妹長下分烈烈个日頭逼到大樹下園，坐在阿爸用粗麻索編樹枋做个晃槓仔頂高，一儕擎一支枝冰，緊舐冰緊打晃槓，涼凉个風吹來，還有樹頂歸陣蟬仔在該「揸～揸～兒～、揸～揸～兒～！」唱歌分佢兜聽，成下屋簷烏、白頭殼¹這兜也來鬥鬧熱，毋驚人个膨尾鼠，也會在樹頂上上下下、跳來跳去。

言讀書个佢膠老妹歸日跔阿公、阿婆奈，有一日阿公愛去巡田水，問講想愛跔佢去拈田螺無？好搞个佢黏時應好，老妹也講愛跔。阿公蹶上棚棟²頂个閒間仔，搨出兩隻細水靴來分佢兜換，又過拿兩頂草帽仔分佢兜戴，佢自家也戴一頂大笠嫲。

阿公肩頭擎等鑊頭行頭前，佢膠老妹一儕攞一隻細錫桶跔後背，佢兜歸路啦歌哩曲當歡喜，阿公笑咪咪安謐佢兜唱著當好聽，佢兜也風神哎哎³緊唱緊大聲。行到伯公下，脣頭該平洋平洋个田，斯係阿公耕个田，阿公指等田脣个溝仔講：「你兜看，這

位斯有田螺好拈咧，跔等這細溝仔直直下，有當多田螺好拈哦！」阿公言講煞，老妹斯好擲擲仔⁴先跳落溝肚去開始拈咧！

佢膠老妹比賽看麼人拈較多，兩儕頭播播盡命拈拈，驚怕分人追過去，麼儕也毋認輸。一下毋堵好，老妹个水靴嘎潔落濫泥肚，水靴肚張滄滄个濫泥，老妹想愛膠腳掛鞋共下擲起來，嘎仰般都擲毋起，還緊潔緊深，佢大聲喊佢過去膠佢搨手，佢拉等佢个大腳髀兩儕共下出力，結果鞋無擲起來，兩儕嘎跔到四腳惹天，搨到歸身潦潦還合泥混混仔⁵，連面也舞到像烏貓公樣。阿公看著遽遽行兼來膠佢兜拉跔起來，再過用手定定仔膠老妹个水靴樓起來。阿公講：「你這兩隻孤盲頭⁶，等下轉去，佢會食若婆毋燥咧！」

驚分阿婆罵，轉到屋下，佢兩儕偷偷躡躡⁷趨落屋肚去，阿婆影著兩隻烏貓公轉來咧，又悶又好笑，喊佢兜遽遽去洗身，膠歸身烏疏滴浴⁸个衫褲換下來。該載好性體个阿婆無發關，毋過，還記得該日洗身洗當久，硬硬會鑪忒一層皮咧，歸身還略略仔臭泥味，這下佢見看著田螺斯會想著這擺生趣个事情。

¹ 白頭殼：音 pag` teu hog；鳥名，白頭翁。

² 棚棟：音 pang chin`；放東西的閣樓。

³ 風神哎哎：音 fung` shin ngai` ngai`；洋洋得意。

⁴ 好擲擲仔：音 hau` zied` zied` er；興沖沖的樣子。

⁵ 泥混混仔：音 nai gun` gun` er；形容沾滿了泥土。

⁶ 孤盲頭：音 go` mo` teu；在此為「好傢伙」的意思。

⁷ 偷偷躡躡：音 teu` teu` ngiab ngiab；偷偷摸摸，暗中夾藏的樣子。

⁸ 烏疏滴浴：音 vu` so did` dab`；烏漆抹黑的樣子。

110 年全國語文競賽客家語朗讀文章國中學生組（海陸腔）

編號 4 號

【滿天星】李得福原作

來到屏東姐公个菁園肚，看著一行一行高天天个檳榔樹，聽講二、三十年前，一分地一年做得收成十過萬銀，還愛牽電火掌菁仔，園肚係有火光，賊仔就毋敢來偷割。這下價數當便宜，正賣著頭擺十分之一個價錢，雖然賣毋成錢，姐公還係打理到青溜溜仔，因為菁行之間有加種時計果，做得賣加一息錢。檳榔樹準柱楯，利用廢電線搭棚仔，有紅電線、烏電索、雙股个白片線，脣頭用白片線牽透龍，紅烏電線橫架直架賡¹成三長列過个彩色時計果棚。

逐年三月春分前後，時計果開花咧，青花托撐起吊菜色个花蕾頭，還有牽白鬚个花瓣副花帽；第二層係五皮青黃色个公花，帶當貴个花粉；最頂高層係三支像擰螺絲个扳手，又像豬仔个飯匙骨，這係嫵个花。佢識看姐公拿一支毛筆，在逐蕊花頂高蘸蘸、搵搵當像畫圖樣，佢問：「姐公，你在該做麼个？」佢指等花蕾摻佢講：「佢摻公花个花粉蘸來膏在嫵花个花蕾町，恁樣正會打子結果啊！」

¹ 賡：音 gang`；織。

青青个細果子在果棚頂吊到淦淦，企在棚仔底下看往上，就像看著滿天个星仔樣。姐公講佢種个時計果品種就安到「滿天星」，當像佢伸手就摸得著也摘得著，又乜食得著个星仔呢！

清明過後無幾久，時計果就轉烏黝紅，看著暗紅暗紅無青影就做得摘咧。佢兜姊妹在果棚底下，臥起頭一隻看過一隻，慢慢仔相，相著係紅到轉烏色就熟咧，甜度罅較無恁酸。摘著半菜籃遽遽扛去倒落紙箱肚，一輪、兩輪、三輪紙箱仔張到淦淦，愛載轉高雄冰起來定定仔食。熱天放學轉來，阿姆會摻時計果洗淨，在蒂頭頂高挖一隻像五十個銀恁大个空，放在水果盤町，佢兜拿細湯匙定定仔舀來食。正摘啊著个時計果特別甜，佢一下斯食忒七、八隻，酸丟酸丟²緊食緊爽口，連鼻空畀出來个氣又乜酸丟酸丟帶有時計果个味緒。

阿姆成時會摻時計果裡肚个仁摻汁挖出來，加一息冷滾水放落果汁機去打，打好用盞仔張等放冰箱冰，分佢兜準果汁食。逐擺係咁這果汁，就會想著在果棚下歸頭白毛，笑到牙西西个姐公。

² 酸丟酸丟：音 son` diu son` diu；酸溜溜地。

【畜羊仔个叔公】羅瑞霞原作

佢公有兩兄弟，佢兜戴莊肚，叔公戴在離莊頭無幾遠个石礮脣，叔公無討舖娘，一儕人戴在礮脣，畜十過條羊仔。叔公講：「一儕人過日仔較自由，又毋使愁勞博激，逐日快快樂樂，幾好呢！」

佢從細斯好遊遊野野，講著搞就一條線¹，毋過平常時，愛上課、讀書，一日到暗斯國語、數學、英文、社會、電腦，搵到佢春頭磕額、頭暈腦疫，毋過到放寮日，該斯係佢个天下咧！

佢最愛去尋叔公寮，叔公屋面前係石礮，石礮脣有一大遍草，一大早羊仔斯在礮脣食草，佢見去到，看著羊仔在該食草，斯挑挑去追該兜羊仔，總愛摻羊仔追到咩～咩～咩緊叫，佢正試著生趣。該量時，叔公在屋肚聽著羊仔叫，一定會走出來看，看著佢在該追羊仔，斯罵講：「孤盲子，又在該追羊仔咧！毋驚下二擺降个細人仔無屎肫。」

佢看著叔公出來，黏時喊一聲「叔公，早啊！」叔公雖然會罵佢，毋過乜盡惜佢，因為佢係屋下唯一个孫仔。叔公笑弛弛仔

行過來，緊行緊講：「羊仔肚屎枵在該食草，你毋好撩佢，落來屋肚佢拿糖仔分你食。」講著有糖仔好食，這又係佢好來叔公屋下个原因，叔公無家無寶，一儕人戴，所以長透有好食个東西就會留起來，等寮日拿分佢食。

叔公雖然一儕人戴，毋過屋下整理到淨淨俐俐，桌頂無半點塵灰，完全看毋出佢係單身哥仔。佢識問過阿公，仰般叔公無討舖娘？阿公講：「頭擺，叔公識熟識一個戴在莊尾个細阿妹仔，該隻細妹仔生著麻筍麻筍已靚，當煞猛，兩儕感情盡好，兩家人也認定愛結親家、且姆咧，無想著有一日，該隻細妹仔在田町做事，毋堵好分蛇咬著，該量時醫藥毋發達，偲俚莊下堵著這種事情，大體都係自家拿草藥捶捶貼貼仔，斯好咧！旨知該隻細妹仔係分龜殼花咬著，無黏時送到街路分西醫看，就恁樣死忒去。這隻細妹仔死忒對叔公个打擊當大，過後叔公斯完全毋摻其他細妹仔交往，當多人愛摻叔公做媒人，都分叔公拒絕，一儕人斯徙到礮脣戴咧。你係有閒，愛長透去陪叔公哦！」

佢黏時應講：「好啊！叔公惜佢，摻佢做伴無問題啦！」

¹ 一條線：音 rhid tiau sienˋ；喻專注於一事。

【放蝦公笏】郭亭好原作

禮拜六阿爸渡偈兜共下轉去莊下看阿公、阿婆；阿公看著偈兜轉來當歡喜，老妹盡會做嬌，一下斯颯去捕等阿公，講佢當想阿公，聽著老妹嘴恁甜，阿公暢到奈毋得，笑到嘩嘩滾。在灶下無閒个阿婆，聽著偈兜轉來，手叮擎等个鑊鏟還來毋掣放忒，斯行等出來，緊掌偈个頭那，笑微微講：「兩儕都較高也較作肉¹咧！還好哪！」

睡當晝跣起來，偈看著阿公當無閒在該用白飯攪糠仔，攪好先分佢歸團，過後正斷做一細團、一細團放落蝦公笏²裡肚，佢講等下愛去放蝦公笏咧。聽著愛放蝦公笏，偈試著當生趣斯嚟³愛跣，頭下碼阿公驚偈危險毋肯分偈跣，偈緊摺阿公保證偈會細義，高不將阿公正渡偈共下去。

河壩肚滿哪仔都係生溜苔个石牯，偈著等水靴行路當毋慣，行無兩步腳斯險險溜著，該載阿公盡流掠，遽遽摺偈揪等，佢講逐步腳都愛先試踩看仔，係毋會滑正好踩上去。偈兜慢慢行到水

較淺个位所，阿公教偈蝦公笏愛放在水較恬又有石縫个地方，佢先摺水底个細砂石用手掙平分蝦公笏做得貼地，還愛摺蝦公笏个嘴順等水流向往落，再過拿石頭砣在蝦公笏面頂，講恁樣蝦公笏正毋會分水打走，最尾還愛在脣頭个大石頭面頂放幾隻細石牯做記號，恁樣，收蝦公笏个時節，斯知蝦公笏放在哪位咧。偈兜順等河壩摺蝦公笏一路放等去，到會暗昏咧正做下放好勢。

本來摺阿公講好第二日愛共下去收蝦公笏个，偈嘎睡到日頭晒屎肫咧都還盲跣。阿公自家摺蝦公笏歸下收轉來，正喊偈跣床摺佢共下退蝦公笏。偈聽著阿公喊，煞煞跳跣起來，牙齒儘採鑊兩下斯躡等出去⁴摺阿公搵手。逐隻蝦公笏張著个東西無麼个共樣，退一隻蝦公笏斯像開一到獎，有个張著蝦公、齊口，有个張著毛蟹、石斑，成下還會張著湖鰱仔，實在還生趣。

這兜對鮮鮮河壩水來个好食材，當晝在阿婆个好手路料理之下，歸桌都係又萋又好食个魚仔、蝦公摺阿婆自家種个青菜，非常豐沛，飯桌頂偈兜緊食飯緊講笑，因為心情歡喜試著逐樣菜都恁好食。臨暗仔偈兜愛轉咧，車仔正駛啊停動，偈遽遽摺窗門絞下來，大聲喊講：「阿公！下二擺愛放蝦公笏个時節，定著愛記得渡偈共下去哦！」阿公緊搵手，頭那緊領、緊應好。

¹ 作肉：音 zog ngiug；長肉、生肉。

² 蝦公笏：音 ha gung` ho；竹製的捕魚、蝦器具。

³ 嚟：音 kiau；言語糾纏。

⁴ 躡等出去：音 liung` nen` chud hi`；衝出去。

110 年全國語文競賽客家語朗讀文章國中學生組（海陸腔）

編號 7 號

【大樹下】謝玉賢原作

記得做細人个時節，佢屋下面前有條細河壩，河壩肚長下看著有幾下隻鴨仔在該泗上泗下，成時佢兜細人仔也會跳落去，摺鴨仔共下搞水，你屌佢，佢屌你，搞到歸身溼漉漉正轉。毋過，分佢印象最深个毋係該條細河壩，係河壩脣个該頭大樹。

該頭大樹，佢个名仔安到爛布樹，樹中央係空心个，毋過佢當耐命，逐年正開始熱，樹葉仔斯跌到滿地泥，四叔就蹶到樹頂，摺樹極鏝¹到淨淨，毋使幾久，爛布樹又會綻筍，樹極一枝一枝，葉仔生到淪淪，大樹底下就係大家唱歌奈涼个好所在，也係細人仔搞奈个好地方。

大樹下長透坐一大群人，逐儕都擎等一支扇仔撥啊撥仔，在該打嘴鼓，七個和尚八樣腔²，下屋个阿真叔講厥俵仔愛做兵咧，佢逐日愁到無結無煞，愁俵仔做兵毋知會分人欺負無？見擺講起斯目汁落落跌³；上屋个叔姆，就講佢个妹仔下禮拜愛嫁人，喊大家分佢請，問大家嫁妹仔有麼个禮俗無？愛砵男家頭麼个？菜粑

愛打幾多斤？扇仔愛分麼儕拈？帶路雞愛幾多隻？雖然有一大堆个問題，毋過叔姆還係當歡喜，暢到牙西西⁴；佢姆乜輸人毋輸陣，摺大家講妹仔考著師專咧，加幾年卒業就做得做先生，搵手賺錢咧。大家你一句、佢一句鬧熱煎煎⁵，有人噉也有人笑，實在還生趣。

大樹下，這片大人在該打嘴鼓，該片个細人仔乜無閒著，細妹仔在大樹下搞份家啦，你做爺仔佢做哀，爛布子串起來做戩鍊、石頭結起來做烘爐；樹葉仔做青菜、樹極做箸，大家搞到當歡喜。細俵仔有兜在該搞園人尋、打紙牌；有兜搞圓子、透土狗仔⁶，這兜綻剝頭⁷，逐個精砵砵仔⁸，看著一團鬆泥就知下背有土狗仔，七手八腳摺鬆泥要開⁹、攞水、倒水，毋使幾久土狗仔就走出來咧，這群細人仔長透搞到愛大人擎等竹修仔喊正肯轉屋下，實在無結煞。

大樹下有佢當多个回憶，係隔壁鄰舍聯絡感情个所在，也係細人仔搞奈个好地方。雖然童年離佢當遠咧，毋過記憶肚个童年還像人在昨晡日樣；該頭根深葉靚个爛布樹，就像一支大大支个遮仔，保護佢兜行過艱難又辛苦个日仔，該頭堅韌又耐命个大樹，到這下還係佢生命中精神个寄託。

¹ 鏝：音 loi^ˇ；削平。

² 七個和尚八樣腔：音 cid gai^ˇ vo shong+ bad rhong+ kiong^ˇ；；形容人多口雜，主張不一致，各有各的說法。

³ 目汁落落跌：音 mug zhib dab^ˇ dab^ˇ died；淚流不止。

⁴ 牙西西：音 nga si^ˇ si^ˇ；牙齒微露，輕鬆愉快的微笑。

⁵ 鬧熱煎煎：音 nau+ ngied^ˇ zien^ˇ zien^ˇ；形容非常熱鬧的樣子。

⁶ 透土狗仔：音 teu⁺ tu⁺ gieu⁺ er；灌蟋蟀。

⁷ 綻剝頭：音 can^ˇ dog^ˇ teu；頑皮鬼。

⁸ 精砵砵仔：音 zin^ˇ guag^ˇ guag^ˇ er；精明的樣子。

⁹ 要開：音 fung⁺ koi⁺；撥開。

【該條大崎】黃美貞原作

戴在這伙房个人家，出出入入定著愛經過大崎，頭擺在該位種有一大片个香絲樹，所以大崎又安到「香絲坪」。對細人仔來講，出門讀書愛蹶崎斯已難耐，毋過日仔總係愛過，香絲坪也變成大家生活个一部分，佢最記得个就係膠阿雪溜大崎無擋仔發生个事故。

上屋个阿雪大佢三歲，五年生該下，就自家騎自行車去讀書，上大崎个時節，愛企起來盡命拈箭，箭毋贏咧正甘願下來用牽个，書包仔放在頭前个籃仔肚，看起來風神哎哎¹，該量時，細人伴都當欽羨佢。有一擺，佢在大崎堵著阿雪，佢講：「佢載你下崎愛無？」佢想著阿姆个叮嚀，遽遽搖頭講：「毋使毋使，佢自家行等轉就好咧。」阿雪當有自信講：「佢日日斯溜等轉，又遽又爽快，加勝²擋仔皮正換過新个，愁麼个？」佢用手試撚仔，車仔黏時頓恬³，看起來已妥當，心肝肚想，試一擺斯好，阿姆毋會知啦！

¹ 風神哎哎：音 fung` shin ngai` ngai`；洋洋得意。

² 加勝：音 ga` shin`；更加。

³ 頓恬：音 dun` diam`；停止。

蹶上車，在崎頂看啊下去，阿姆哀！腳底撓撓，雞嫻皮膨膨起，阿雪講：「你會驚係無？」佢毋願認輸應佢：「有麼个好驚？」其實佢驚到會死又毋敢講。阿雪吩咐佢愛扳好勢來，佢兩隻手揪等佢个衫，目珠眨到密密，車仔順順仔溜下去，聽著唧唧滾个擋仔聲，心肝加已定貼，按算加一下仔就到咧。無想著，溜到半崎仔个時節，擋仔嘎恬忒，這時，阿雪放勢牯喊：「無擋仔咧！這擺死無命咧！」佢毋知愛仰結煞，斯會跔等阿雪緊喊。

「砰～」聲！車仔正正撞落一墩笏竹去，佢擘開目珠，看著阿雪橫在竹頭下，企毋起來，緊噉緊呻：「還痛！還痛！」佢摸一下溼溼个鼻空，手巴掌全係血，原來係出鼻血咧，該載手腳還做得停動。佢定定仔蹶蹶起來，顧毋得滿鼻空个血，一路行轉去伙房尋人，好得阿泉叔兩子爺堵好轉夜，奧多拜一頓恬，兜起廳下个藤椅，跋起腳就去膠阿雪扛轉屋下，遽遽打電話請莊頭个魏先生來檢查。阿雪也命靚，斯手腳鑪溜皮定，毋過可能係嚇著咧，暗晡頭緊發狂⁴，食睡毋得，厥婆還渡佢去分陂塘下个恩主公收驚。

到今想起該擺溜大崎逞英雄个戇事，心肝肚還會怒忸⁵一下，雞嫻皮又膨膨起。

⁴ 發狂：音 bod kong；失去理性，舉止狂烈、異常。

⁵ 怒忸：音 nid` nug`；受驚的樣子。